

欽
定
全
唐
文

欽定全唐文卷八百十四

樂朋龜

朋龜字兆吉滑臺人第進士中和元年官翰林學士承旨
知制誥後以太子少保致仕

蕭邁判度支制

門下經費之權雖繫乎理本變調之任尤重於國鈞誠不
欲叅而委之蓋所以仗其能者吾之注意用表推恩况方
軫阡危尚屯兵甲說邦籍於魏相佇竭宏規付軍食於鄴
侯必施良術爰從成命俾洽輿詞特進行中書侍郎兼戶

部尚書同中書門下平章事監修國史上柱國蕭遘業嗣
代天材承構厦懿績繼傳於王府嘉猷允紹於廟堂眾謂
國華雅得韋平之稱時推人瑞諒齊管樂之名洎辭中殊
科辟隨重地班行履歷刀尺精英由右史以踐南宮自中
戎而昇內署久傳密命繁組繡於筆端旋總憲臺定準繩
於朝右爾後方調國賦俄屬時難盡心於造次之時首奔
行在秉節於蒼黃之際足驗歲寒潔身之道旣彰許國之
誠可監俾其援力乃爾疇庸遂契風雨尋當鼎鉉可謂佐
時之道知無不爲奉上之功久而彌著於今者將平逆寇

須邱王師方懸飛輓之勞日俟誅夷之計非爾洞達不足以絕奸欺非爾精靈不足以希饒羨所宜究其利病計彼盈虛使兵實賦均家給人足自然凋傷漸復饋餉不虧既無艱食之虞並表和羹之用惟期黽竭方見沃心勉副具瞻式彰殊渥可兼判度支餘並如故

王鐸宏文館大學士等制

門下韋弦並佩則情性和文武兼修則事功濟況巖廊重德柱石賢臣方當彌寇之時正委運籌之畧各覃恩渥用獎勲勞開府儀同三司守門下侍郎兼司徒同中書門下

平章事上柱國晉國公食邑三千戶王鐸太極儲精華池
稟潤文能師古業擅經邦光輔數朝偃仰三事挺許國忘
家之節蘊經天緯地之材金紫光祿大夫守中書侍郎兼
禮部尚書同中書門下平章事上柱國裴徹玉海澄瀾金
莖擢秀泉渟襟抱岳立標儀道則有常材惟不器松竹見
後凋之操輪輓彰致遠之功銀青光祿大夫守尚書工部
侍郎同中書門下平章事上柱國蕭遘維岳降神昴星應
瑞琳瑯瑩茂雲日孤高業著代天闕一字惟周物偉望而汪
洋自遠清規而俊拔難偕並智比著龜祥同麟鳳備彰器

業遍踐清華雲霄次第以登臨臺閣從容而履歷或鬱爲
國老或宛定臺臣人無間言朕所注意自妖兇搆逆巡幸
西來皆能間道以潛奔竟致臨軒而再會益堅臣節仍罄
廟謨杜征南注傳彰閑謝安石圍碁決勝每聞盡瘁九切
圖功更宜講貫安危錯磨理本用蕭曹之秘畧繼房杜之
高蹤佇見中興實資良術再踐大貂之位三居文館之權
首鎮元台備兼眾務或官當喉舌職重陽秋或位正中樞
榮兼秘殿大儀峻秩馭貴崇階式示優恩更申獎勵早清
巨孽俾振皇綱使雲龍魚水之歡永光於竹帛王鐸可司

徒兼侍中充太清宮使宏文館大學士兼延資庫使散官
勲封如故徹可特進門下侍郎兼兵部侍郎同中書門下
平章事監修國史勲封如故邁可光祿大夫行中書侍郎
兼禮部尚書同中書門下平章事充集賢殿大學士勲封
如故主者施行

王鐸中書令諸道行營都統權知義成軍節度使
制

門下廟堂之上教化之源康濟萬方彌綸百揆可謂朕目
時之著龜不宜斯須蹇違顧盼其或繼陳章表備瀝精誠

以大慙未平每痛心而疾首以中都未復嘗瀝膽以披肝
志在總戎期於弭變永言許國真是盡臣遂命更陟韓壇
重辭槐鼎統六師而雷動屯萬旅以風馳併集寵命以堅
茂績開府儀同三司守司徒兼太子太保同中書門下平
章事充太清宮使宏文館大學士兼延資庫使上柱國晉
國公食邑三千戶王鐸名高嵩華量等滄溟情田洞開心
地無滯造次靡忘於忠孝幾微不捨其規繩靜彼波瀾莫
分喜愠洎乎昇甲乙綴鵷鸞履歷清華從容道德咸推器
業必爲王佐之才盡伏機權乃是公台之望爾來盤錯果

副重難筮短龜長開物成務同叔敖之爲楚相比孔光之
輔漢朝出於一時膺是三命其爲寵重豈無等倫朕以克
荷丕圖內慚涼德致其郊廟陷於狼狽若墜溝隍如懷水
火未嘗一飯之飽一夕之安宥過責躬臨深履薄遂致元
穹下監元老請行面陳腎腸忠貫天地振朝廷之武力挫
妖孽之殘魂惟其疾風方知勁草况津臨白馬地壓洪河
擁東夏之銳師視中原之沴氣必期破竹自可覆巢昔元
凱之著殊勲謝安之膺上賞功銘鼎鼐指誓山河遐想芳
塵必符壯志爾宜奪其租賦瞻彼甲兵使退無玩寇之虞

進有老成之誠訓齊勇士克彼都城屠梟獍之軀以爲京
觀戮鯨鯢之首用獻宗社嗚呼寰海流離生人塗炭眷言
緊賴實洞神明是用榮分和嶠之車光佩蕭何之印勉思
注意勿怠厥功可司徒兼中書令充諸道行營都統兼指
揮兵馬收復京城及租庸等使判延資庫事權知義成軍
節度管內觀察處置等使餘如故仍令所司擇日備禮冊
命軍罷後却赴中書主者施行

賜陳敬瑄太尉鐵券文

維中和三年歲次癸卯十月甲午朔十六日己酉皇帝賜

功臣劍南西川節度副大使管內觀察處置統押近界諸蠻及西山八國雲南安撫制置指揮諸道兵馬供軍等使開府儀同三司太尉兼中書令成都尹上柱國潁川郡食邑三千戶食實封四百戶陳敬瑄鐵券曰烹巨蠶者鼎大於滄海斬長鯨者劍倚於青天旣立異勲克膺殊寵李晟免其十死子儀成其九功鏤以金鏞賜其鐵契後來繼者豈在他人歲寒知松柏之心國難見忠貞之節五山鎮地一柱擎天氣壓乾坤量含宇宙自居環衛出擁旌幢論清政而冰鏡無光吐赤誠而朝霞失色手持玉節身鎮錦城

扶乾綱而萬國安心紐坤維而百蠻遙指三川欽化一境
歸仁朕以稅駕褻斜省方邛蜀匍匐而來迎鳳輦馳驅而
速建龍宮百辟來朝萬方入貢夏禹塗山之會未盛於斯
漢高沛國之歡無以過此戮阡能疾如剪草除秀昇易若
焚巢不讓武侯之勲無愧文翁之化海東獻款雲南披誠
九穀豐登三農茂盛濟瞻軍國拯救朝廷內竭家財外罄
公帑千官感惠一國推功今則巨猾奔逃神州克復將歸
上國卽別成都致朕身安由卿忠盡前封公爵後賜郡王
詢於眾情未愜羣望今賜卿鐵券赦其十死望泰山而立

誓指黃河以爲盟山無盡時河無竭日君君臣臣父子
子永遠貴昌並皆如此

西川青羊宮碑銘

原夫八十一天比太上之半壽六百萬歲當元始之初年
道渺邈以難窮體希夷而莫究在無象無形之內居太初
太易之前龍漢之劫再成鳳紀之文未立藏萌芽於浩素
隱根榦於龐鴻二神最負以俱來鑿開造化三氣氤氲而
互進撲散胚渾元黃流而未凝清濁分而乍結日月星辰
之內化出靈宮川源山嶽之中變成洞府則知道爲萬氣

之祖德爲百物之宗以二儀兩曜爲子孫以五行四象爲
枝葉當其洪肇先啟紫極後成仰其高而彌高考其上而
無上八公皓首當時之未有乾坤九老白眉厥後而初生
天地探至真之理臻大道之元列仙之境界延洪上士之
齒齡逾遠以六千春爲兩月尚歎浮生以七萬歲爲二年
仍嗟短景智者見之謂之智仁者見之謂之仁和光而眾
曜皆慚挫銳而攢鏃盡碎元珠匪類真璞無瑕學而知之
者爲中生而知之者爲上三君五老覩兆人如醢鷄七聖
九皇視百姓爲芻狗煦千古而冰釋成眾善而泉流至明

若蒙蒙間而萬物俱照大巧若拙拙中而萬事皆成爲於
不爲用於無用黜口爽於五味杜耳聰於八音忘象忘言
易脫一時之屣無關無捷難開衆妙之門九萬靈仙聚集
於一毛之孔三千儒術荒蕪於獨角之端故知道儒二門
經綸一揆立清淨爲理體虛無爲師以上天爲大車之輪
以列宿爲大車之輻駕之以乾馬之馬輓之以坤牛之牛
搬運無爲之功覆載自然之道光而不曜養正於蒙昧之
中簡而能廉修真於仄陋之內不可得而疎矣離之而匪
遙不可得而親焉用之而逾遠不可退而讓不可進而求

被褐懷玉之人美之又美罔象求珠之士斯焉取斯移世
界而入壺中吞維摩方丈之室縮地形而藏術內掩悉達
王舍之城有道之根修作立天之址無名之樸標爲鎮化
之元三千威儀恭謹於文風之教五百戒行肅清於釋氏
之門張天爲弓調之以陰陽寒暑直道如矢激之以春夏
秋冬一夫用之而無餘兆人用之而不竭日窟月窟隱身
而曾作穴居南溟北溟遁跡而聊游水府桃源蓬島從古
有而今存槐市杏壇見朝榮而暮落仙圖秘密五千載而
三傳聖道靈長百萬年而一代容易而學之者似紐石以

爲繩侮慢而求之者如鑽冰而待火絕巧棄利顯微闡幽
坎離震兌之宮宮內而咸居羽客東西南北之斗斗中而
皆住真仙身駕德車輪轉於混沌之外手持壽柄指揮於
開闢之前寂爾無營澹然自得化其不化則萬化而皆成
生其不生則羣生而盡遂虛懷待物曠意承時藏泰山於
秋毫之中秋毫仍大納崑崙於黍米之內黍米猶寬大象
無形五岳空空而立也大信不約四時默默而行焉真宗
之敎皆成不宰之功益著太上金闕元元天皇大帝則我
巨唐之高祖按國語曰自周平王七載泊於秦至開元聖

文神武皇帝卽三十六代之聖孫赫赫日苗布蔭於普天
之下明明國葉垂芳於率土之濱當其幽原旣開九氣陶
蒸而未已元化大闡六虛流轉而勿休設不二之教門稽
真一之宗本浩風吹海三迴之重作飛塵劫火銷山五度
之却爲平地先逍遙於青運青運旣周後汨沒於赤明赤
明復畢九十九萬億歲貯在彈丸五千五百重天藏於卵
殼殷高宗御極之際周文王演易之初神光流入於瓊胎
瑞彩結成於金骨不圻不副誕彌於八十餘齡降瑞降祥
過期於二萬餘晝足蹈不滅之理手握長生之文包乾裹

坤把日捉月額列參午頂荷圓穹耳開三門鼻立雙柱白血紫腦蒼肝青脾項引三十五光齒含四十八貝七色青蓮而隨步千年白鹿以呈休桑田變而雙檜不彫江河枯而九井不竭苦縣賴鄉之里靈跡長存陳國渦泉之濱神蹤不泯七百弟子指扶桑爲故林九五帝君開日宮爲舊館詳其元始稽彼厥初俯窺溟滓之前下視渾淪之後隨機設教作九古之楷模應變無方爲百王之軌範若乃歲起攝提肇開氣象一十三聖之踐祚萬八千年之應圖我太上聖祖應運降跡與天皇爲師上清下濁之初開相離

未遠六合八紘之乍坼相去未遙正方圓上下之形定洪
荒朴畧之狀川新融而水仍晦山始結而石未堅種天上
之白榆初生厯厯植月中之丹桂乍出依依配四海於四
神付五行於五帝是時乾象猶低坤形仍薄立極定位敷
化建功我太上聖祖屑跡下降與地皇爲師分配剛柔制
定寒暑地增博厚天益高明聖力難窮神功靡測萬木甲
坼萬草勾萌羽族毛羣區別於兌離之位介蟲鱗類支分
於坎震之宮四溟之水皆空未生魚鼈五岳之形俱靜未
吐雲霞已逾清海之年又離清海之歲二聖旣理四表生

光我太上聖祖博施濟眾與人皇爲師三百六十之川初
分血脈萬一千五百之策乍配偶奇三壬三乙之神離胎
於水木六丙六辛之將出孕於火風一百五十六代四萬
五千餘年始稱通元天師再號金闕帝君三名盤古先生
洎乎庖羲氏之王天下也我太上聖祖以道宏濟降跡爲
師仰觀圓蓋之文俯察方輿之理教之以畫八卦指之以
分三才助之以造書契之文制之以代結繩之政典墳自
我而出經籍自我而生以佃以漁蓋取明離之象一索再
索用乎出震之功鳳凰呈瑞於帝庭龍馬負圖於河洛享

國一萬八千歲矣洎乎連山氏之王天下也我太上聖祖
救時屈已下爲帝師付之以五運分之以四時助之以正
萬機明之以辨百穀變飲血茹毛之化移蕡稗土鼓之音
毀穴焚巢上棟下宇範金合土燔黍擘豚製耒耜以濟兆
人作陶冶以利萬物天雨粟以呈瑞地芸稼而彰稔農食
嘉穀山出器車洎乎有熊氏之王天下也我太上聖祖隱
身於崆峒之中放心於杳冥之外帝乃親降輦路禮展師
資能握衣以趨隅遂屈膝而問道當是時也榆罔凌虐蚩
尤作亂化魚鼈爲兵士以助王師變雲霧爲神祇潛扶軍

陣能弭兵於涿鹿致偃戈於阪泉東游青邱之鄉北到洪隄之境受丹經於王屋登蒼冥於鼎湖屈軼旣生冀莢復出若非大道孰可致斯洎乎金天氏之王天下也承姬水之源襲熊山之錄告天類帝纘緒守文我太上聖祖乘九龍之輦降以爲師號太極先生說莊敬之典教之以順時迎氣昭配神明禋於六宗秩於羣望乾乾翼翼得禮之宜羽族呈休命之以鳥官爲理分布九屬以統八司景合璧以表靈鳳銜圖而示貺悉由至道彰此帝模逮至高陽氏之王天下也我太上聖祖教之以解紛塞兌治國安民滌

蕩九黎陟明八凱有龍野紫髯之兇醜有蛇身赤髮之巨
魁力拔不周首觸山碎天低西北致日月之西行地亞東
南使江海而東注追呼六甲役御百靈訓之以微言之經
教之以大順之道乘元虬之迅駕或適幽陵御素螭以遐
游或臻蟠木觀吾仙柰萬年而一度開花觀我靈爪四劫
而一迴結實及乎高辛氏之王天下也我太上聖祖敷道
布化下濟爲師譚黃庭之妙言隱日遁月稱綠圖之嘉號
遷邑移城制九州之名作六英之樂封勾芒以佐蒼帝勅
羣收以翼白方示岱嶽而印金泥照寰區而開玉鏡飲大

活之井游不夜之鄉燔青鸞之膏充下仙之次饌擘黃騏
之脯爲上客之珍羞逮至陶唐氏之王天下也我太上聖
祖暫垂至理下降爲師講元德之經道已匡於元化應丹
靈之瑞名冀列於丹邱和煦清風不作鳴條之響雍熙黃
髮時聞擊壤之聲庖廚之肉脯自生載餚失味山谷之醴
泉潛湧麴蘖無功達四聰以闢四門立五事而敷五教披
鹿裘以食糲饌端拱於土階掛鶴氅而飲流霞凝思於瑤
圃有虞氏之王天下也我太上聖祖譚無爲之理講離合
之經三苗克悛四罪咸服百揆時序五典愼徽懷明神之

珠賜昭華之玉眉與髮等表踐祚之嘉祥壽與天齊彰延
齡之景福甄一十六相用二十五臣致百辟以協和如魚
在水感兆人之歸湊如蟻慕膾化靈氣爲天書何勞筆力
結卿雲爲寶殿不假人工夏后氏之王天下也我太上聖
祖克匡王道爰作帝師譚德戒之經行爲國之法櫛沐風
雨刊槎山林成九年理水之功爲四載勤王之業卑宮陋
室盡力於溝洫之時襁服縷衣飾身於黻冕之禮導馬頰
而奔流竹箭鑿龍門而迅激桃花救兆庶而皆免爲魚濟
陸土而永非成海胸羅玉斗掛天文之在躬手展瑤圖懸

欽定全唐文

卷八百十四

雜用韻

三

國命之由己故知大道者三教之冠冕上德者百聖之宗
元成湯氏之王天下也我太上聖祖權離左極下爲王師
說長生之經體自然之道去三面之網開一目之羅獸遠
逝而莫縈禽高翔而不罾引萬方而罪已數六事以責躬
話之以八素七真講之以六虛十訣千歲桃花之蜜味掩
朱漿九垓薤葉之蔬滋霑紅露乘三光而電轉駕六氣以
烟騰窺海瀆如涓涔視嵩衡如蘭栗餐風飲露跨空攝虛
以十洲爲少游之宮以六極爲暫別之館驅徭中士役試
上仙素髮一莖懸起萬斤之石綠筠數尺變成百丈之龍

得之者七祖超昇失之者一身迷悞必在堅修慎習棄苦
忘辛可以陶冶二儀埏埴九土青羊肆者按本紀則太上
元元大帝第二降生之所自殷道否閉周德凌夷陸海沸
騰百川振動山鳴谷吼雨嘯風號厯藏史以同塵棄柱下
而隱跡東離魏闕西度函關乘青牛宛轉之車駕白鳳逍
遙之輦徐甲執御從仙帝以爰來尹喜占風知道君之必
至暫別而三千甲子曾作赤童相逢而八百年齡永依黃
老潛傳妙訣暗付微言重爲千日之期再結一時之會暫
朝元始却上天中之天永奉宗師重歸象外之象開寒靈

之丹殿登眾寶之瓊臺坐紫金之牀凭碧琳之机太清仙
伯仗星光錦文之旗太極仙翁執月華命神之節皆拜手
稽首以心觀心於是勅青帝之青童化羊於蜀國乘紫雲
於紫府降瑞於王宮將停不頃之聲須及來斯之乳俄聞
喜至頓止嬰啼爰初從赤子之聲却變白頭之士頃刻而
身餘十尺須臾而面放五光頭戴七曜玲瓏之冠肩垂九
色離羅之帔衛士逾億從仙成羣感十方之眾真徧滿寥
廓應八表之瑞氣充塞虛空香散九微之烟花飛六出之
雪將離蜀土欲化胡風遠適流沙長移獷俗及身毒屬賓

之國敎頭陀阿柱之王恣剛強愎戾之心起烹焚鑿刺之意巨錡然湯以沸地我則入之如涼泉積薪烈火以連天我則坐之如紺霧挾白挺者觀如蓬草持赤刃者視若鉛刀四天之兵眾俱來聲喧霆霹萬里之神威共護力轉山河八十一種之獯戎皆歸清化二千餘國之獷悍永革昏風俗旣變矣道旣成矣分身作佛濟如來千劫之功降跡爲師救王者萬機之務至若銅渾測運玉厯推禎天七五而一三及九乃滿地八六而二四到十乃盈變通陽九之災窮殄百六之數雖宓義軒昊之代無以免斯高辛唐虞

之朝不能避此粵以廣明元祀歲在上章月當大蜡巨猾
開釁於天邑渠魁倂擾於國步兵纏九野羣臣咸議於省
方蛇起陸風四岳齊迎於巡狩長鯨呀口聞欲灋吐鎬之
聲封豕橫牙衝列刃攢鏃之隊牛蛇未搏食吾黎庶之膏
象蟻未除穴我樓臺之地塵蒙華蓋盜梗天衢九龍齊駕
於雲輿玉輪西轉萬乘同迴於坤軸金闕南開涉水則波
神捧舟登陸則地祇扈蹕太元城内化出行宮濯錦江邊
權安正殿執玉帛者數盈萬國列鵷鷺者位滿千官雞林
之郡來朝鰲山解纜鶴拓之城入貢象駕來王當戎夷率

服之辰誠文軌混同之日苗人未格方資益贊之謀扈氏
延誅正賴允師之力熊韜豹韜之將俯立軍功龍角羊角
之山可追聖瑞二十八化猶乘白鶴而來一百六災必跨
蒼虬而救潛扶宗社幽贊子孫赤光照灼於庭臺太平顯
兆紫氣晶瑩於梅篠元吉九彰稽彼變通明茲感應尋其
靈跡果獲寶輶上有古篆文曰太上平中和災於是驗其
六字表此百祥擊之卽聲類鳴璆觀之則狀如宏璧歷周
秦魏漢之代玉篆仍新經晉宋梁隋之朝銀鈎不故藏諸
韞匱祕其緘滕克盛皇猷顯標青史歲代綿邈疆井變移

舊址苔封古壇蕪沒仙鄉故里半落俗家真境餘風惟殘
瓦礫枯松夜月稀聞元鶴之聲暮草秋烟空聽莎雞之響
當時雲洞多隱狐狸昔日芝田盡生禾黍遐追靈跡顯驗
休禎皇帝特下明詔創造靈宮恩賜內外行用庫錢二百
萬爰徵班匠乃速厥功於是木神選材九層重構地祇獻
土百堵俱興水伯進泉以爲池山靈走石而作礎巍峩雲
閣乍似化成岌業霞堂初疑涌出簷張羽翼棟壓虹蜺粉
壁霜凝丹楹火亘窗籠倒景戶闢長霄塑像新成儀彤乍
降神情欲語似講五千之文意貌將行遠化十方之士金

爐芬馥寶繖回旋乍覩出檻之羊猶疑跪乳初觀如鍊之
馬尚慮嘶風庭翦蓬茅重生瑤草園除萱槿再吐瓊花岡
阜崔嵬樓臺顯敞齊東溟圓嶠之殿抗西極化人之宮牽
劍閣之靈威盡歸行在簇峨嵋之秀氣半入都城烟粘碧
壇風引清磬故得五老下降四真俱來畫地而成其江湖
撮土而作其山嶽坐致風雨可以倒洛傾河立起雲烟可
以反畫作夜化草木以成軍旅變士馬以成叢林如斯出
師豈惟百勝如斯伐叛何啻七擒是以天災流行盡彼盈
虛之理歷數倚伏稟其否泰之宜左慈呼召於神兵鞭笞

羣盜許遜指揮於力士翦蕩狂妖所以陰隲兆人彌綸萬里祁瞞丹水累陳馘告之功牧野昆陽累獻遺俘之捷戈甲耀乎八水營壘塞乎四郊陣勢雲橫軍聲雷動血灑空而驟雨赤沙漲野而飄雲黃困獸摧牙長蛇畏尾效鄭人之宵潰觀楚幕以晝空德均而義士致身氣直而王師難老度日而長鳴金鼓曾不告勞終年而不解鐵衣未嘗言苦旣而鳳城光復龍德昭明枉矢當弦穿月之功奚用長竿在手撞天之勢何爲遂至修鯢脫泉狂兕入匣師道運耒斷領於赤心之徒祿山數窮劈腹於蒼頭之輩況逆巢

千紀悖氣凌空鳴螻蝻七百餘齡聚豺狼數十萬眾傷殘
九土凌犯二京蓋因祝天網以緩誅布仁風而寬戮遂偷
生之五載併除惡於一時蚩尤之塚旣成堅埋鐵額長狄
之喉已斷永戢雕戈立此神功實資道力我太上金闕元
元天皇大帝爲天地父母作帝王宗師歷敎三皇皆萬八
千歲候乎四氣交會五運合同國位永付於子孫聖祚上
齊於日月克紹萬八千之歲矣我高祖神堯皇帝應天受
命歷數在躬以鄉觀鄉去仙鄉之無遠上德不德增帝德
以彌高輟九尺之班符封山印海追八景之仙輅輾霧盤

雲負展垂旒當陽闡化我太宗文武皇帝握乾闥坤修文
偃武大禮無體百禮而盡執根元大音希聲一聲而振動
金鼓天錫勇智繫虎豹如束芻神助皇威跼蛟螭如結蚓
還真返素游藝依仁以無繩爲繩縛六雄與五霸以不器
爲器籠四海與九州然後爭於不爭則戰爭而永息欲於
不欲則嗜欲而長消方士眾臻真公來格安期之棗異狀
大若匏瓜園客之繭殊形磊如盆盎垂衣一百五十代享
國一萬八千年伏惟聖神聰睿仁哲明孝皇帝陛下克紹
丕圖統茲大業心懸壽鏡身享福庭帝道中興國根深固

永保神器長正皇綱虎牙將軍領八千之勇士龍頭元帥
提百萬之精兵永以鎮定區中永以削平天下巨鼇斃而
形軀塞海長鯨戮而髻鬣插天或炙或焚盡千山之木以
烹以飪竭五湖之泉紫焰腥膻青萍膏血祆日墮落孛星
隕墜蒼旻開豁黑氣消亡獻巨逆之三顧告行朝之九廟
耀武威於英代立京觀於神州歲越大椿年逾巨浸天瞻
北顧備法駕以返堯庭帝澤東流乘仙輿而懷魏闕集羣
牧以頒瑞朝諸侯於明堂撫逸搜沈興滅繼絕八龍雲篆
降禹稷之天書二武聖文炳商周之帝德中階平而國泰

至德正而時雍成寶祚之神功由太上之聖力端拱垂衣
恭己正南面而已矣劍南西川節度使太尉兼中書令顏
川郡王陳敬瑄夏日高懸吐赫曦之可畏德星永聚寶祥
瑞以明標遙闢龜城遠迎龍駕獻璿璣以酌大化如轉碧
天移蓬萊以作行宮似離滄海郭琪扇搖於行伍阡能搔
動於山林韓秀昇聚蚊爲雷陽師古積螢鬬日生擒者有
同縛鼠誅戮者無異刲羊舞百獸於庭前堪標玉牒役五
丁於麾下可碎鐵山雖文翁武侯之才蕭猷王濬之策未
可與儔昔韋南康鎮成都二十餘載郭汾陽爲輔弼二紀

在朝比其勲庸量其惠化則請畱九閨之儲一裘之歲未
爲多矣耀陳氏劍南之政掩裴度淮西之功具載典彝永
光勲績行在都指揮使左神策軍中尉十軍軍容田令孜
崑岡玉柱獨力扶天大華金蓮張心捧日佐聖而出爲國
而生有逾千越萬之才有聞一知十之智暖然和氣助青
帝發生之仁卓爾高情仰素王垂訓之道觀帝符而五賊
皆見握人鏡而萬象難逃聰可聽其無聲明可察其未昧
弼時立德開國承家賞罰無私九土之諸侯懷惠恩威普
度十軍之將帥歸心克已推誠虔心奉道古原層構敬之

而無異丹臺舊貫規繩仰之而如昇白日禮無上之帝主
事威儀之法王神獸八千衝犀象如螻蟻天丁三億轉海
嶽如萍蓬周尚父之成功身居第一漢鄼侯之著績才獨
無雙鏤鼎銘鐘紀勲頌德左僕射平章事蕭邁器業絕倫
神秀貫古筆海壓淮湖之浪學山凌衡霍之峯天植國楨
文滋相業一匡皇化八秉洪鈞函丈之間布奇兵之億萬
跬步之內安率土之蒸黎黃鶴頻鳴雖召公之可控青牛
不喘或邴吉以難知吏部尚書平章事韋昭度宗廟重器
社稷令臣當昂位以星懸鎮台階而山立蘊珪璋特達之

德植松筠貞固之心窮訓典以立心正風正雅調鹽梅以
味道肥國肥家仲父上公空就九三之位大臨禱戲虛垂
二八之名兵部尚書平章事裴澈澤馬表瑞天驥呈祥雄
節貫時清風滌俗銀漢橫空而高朗玉繩垂象之英華學
川則四瀆波瀾書林則五松烟雨正氣凜於朝野直道貫
於羊腸自輟職瀛洲登庸昭代重持傳說之舟楫再秉臯
陶之鈞衡皆磨智刃而裁莽腰盡淬文鋒而剗卓腹內飛
龍使楊復恭甲門華胄鼎族令名三教精通九流澄澈體
物則左張却立緣情則鮑謝推先論昆仲而八龍掀髯談

經史而五鹿折角秉樞衡於累代貫名氏於百家稟吳季
札之仙姿抱孔文子之敏惠青山蘊玉發羣岫以光輝綠
水懷珠起一川之晶彩內樞密使開府儀同三司苗允禮
四瀆比位五星炳靈清掩玉壺義輕金諾智圓若月長垂
助日之光辯注如川每湊爲王之海秉氣正直執心溫恭
王佐宏才帝臣重器當軸而身迴地紀持樞而手正天文
宿稟道門素欽直教信言不美常行質奏之詞法語可尊
每契和平之理內樞密使驃騎大將軍李順融三傑挺生
千山發秀元禮龍門之峻慶及令孫少君鶴駕之高福茲

靈葉掌萬機之密務濟一國之黎人公清而水鏡含虛正
直而朱繩讓美博學則邱墳著績操觚則錦繡成文實腹
守真棄百慮於襟懷之外虛心待物納八荒於方寸之間
監軍使驃騎大將軍兼三川制置都監劉景宣景宿呈祥
卿雲布彩風骨俊邁才量宏深淮南王之瓊林驂鸞不遠
河上公之蘭友跨鶴非遙贊護克勤勲庸永著左街威儀
明道大師尹嗣元大仙靈苗高族茂葉太上元元之上足
文始真君之哲孫七歲悟道十三逢師紫玉之骨將成終
游閭苑黃書之文已究卽上朱陵道士李無爲國源清派

天葉芳陰真訣千里窮研咸達仙經萬卷諷覽無遺皆同
在師門結爲道友三天鳳璽化靈炁以成書一粒龍丹駐
童顏而度劫星冠月帔上禮於元皇虹轡雲輿前朝於大
帝金蠶五斛暗吐仙絲瓊節一雙遙迎真侶自昔忠臣明
主咸理國以昇天應歷運以救時蘇生靈而畢績少昊顓
頊皆上紫微之宮君夷太公俱乘碧霞之輦其宮室牖戶
臺榭池塘似雲霧之結成如丹青之寫出七十二之福地
三十六之洞天神仙之窟宅相連以青城爲戶牖真境之
風烟不雜以蟠冢爲壇臺可以濟渡四迷開宏七部仙衣

非製而自有豈假紉針仙車不駕而自行曾無轍跡九重
天上白玉爲京千雉城中黃金作殿披袞服而身掛日月
戴冕旒而坐鎮乾坤天綱正而四氣和國步安而三元序
手執長生之柄制定白駒心藏要道之根控乘赤鯉況乎
代變時遷綿歷於三千餘歲建邦立國崢嶸於四萬餘年
門巷新成人烟漸熾當時闐闐髣髴如存今日宮庭精新
尤盛七色鳳輦駕幸仍頻九班龍輿巡禮彌敬太虛天館
常開不夜之門天極福堂永對長春之景氣連碧落光掩
赤城臣職忝禁林身叨詞客涉儒海而素淺渡文河而不

深董仲舒五彩之蛟稀來筆下楊子雲三清之鷄少到毫
端愧無黃絹之才難紀紫烟之瑞詞曰

洪源肇開浩劫無際恍惚大道希夷象帝太初旣隱太始
來繼元黃在殼清濁未蛻天地之前億千萬歲山比我久
如電之逝海比我大如絲之細與釋比較空門永閉與儒
並功章甫無勢昭德塞違解紛挫銳設教隨機應變無滯
三皇益明五帝增睿率土皆泰羣生咸濟樓觀發軔函關
掛轄屬賓闡化身毒布惠無狀之狀無聲之聲去莫可送
來莫可迎強字之字強名之名太虛之上黃金爲城杳冥

之外白玉作京煥赫六極牢籠八紘萬國同酌百壑咸傾
莫得而竭莫得而盈淺而行者長居利貞深而行者永致
太平凜凜烈氣化作天丁鬱鬱勁草變爲神兵火刀電耀
霜劍虹明芟戮封豕瓜剖長鯨地古風變俗阜時清年代
綿邈歲月崢嶸新宮是建永觀厥成赫赫高祖明明聖孫
開鑿造化剗剔胚渾把捉日月包裹乾坤鸞蹕鳳跼虎步
龍蹲鳥卵之中可納穹旻黍粒之內能藏崑崙塵波澄澈
智浪淵淪迷羅自解瑩鏡難昏萬象俱盡惟道獨存三教
爭長惟道獨尊心藏五賊國靜九門逢逢諫鼓汎汎衢樽

五方八貢八表爭奔車徒川鶩租賦雲屯巍哉玉皇煥赫
金籙靈宮八海水府四瀆堯湯寶位舜禹天祿巨寇梟殄
神州克復去召千神來臻百福天轉碧輪地旋黃轂獻玉
十珏貢金九牧寒暑運行禎祥倚伏害蛟斃刃狂兇殪鏃
軒鏡在握殷繩當木瓊臺九層銀蠶五斛手指青牛身騎
白鹿洞啟括蒼天開王屋皇根國葉帝宗天族明堂端拱
元臣啟沃四海萬方無思不服九虬天矯雙鳳迴旋鶴駕
清漢鸞駟紫烟累行盈百積功滿千丹瓊樓高上接九天
碧玉壇峻下降八仙犬吠蓬島龍耕芝田地有謙道東走

衆川人居上德南御羣賢大活之井長生之泉延洪聖祚
萬八千年鶴涅不緇烏非染黑然於自然得於自得何以
發蒙內辨其惑何以開悟中修其式如車指南似星拱北
隱見無常變化不測大象難包二儀益塞大智難展六合
陋仄長生之柄永壽之域朝服刀圭暮生羽翼廟獻三顧
風清萬國靈觀新構羣仙來格瓊宮寶臺玉書金策豐碑
嶽立巨龜鼈逼詞惟頌美文匪誕飾鸞鶴翹蹲龍蛇騰擲
紫氣氤氲赤光歛輶七聖握圖九皇執勅梵宇無光儒宮
失色端冕明堂垂旒御極運齊三五慶延萬億開闢寰宇

咸仰道德永致中興皆從帝力

僖宗皇帝哀冊文

維文德元年歲次戊申十月乙丑朔二十七日辛卯僖宗
皇帝將遷於靖陵禮也羽衛旣整笳簫畢陳感切羣品哀
動人神孝弟嗣皇帝臣國體情重天倫痛深範規鴻烈想
像徽音舉觴莫以頓首援哀冊以寫心詞曰

天寶生聖聖必爲君銀河色變玉清氣分祥圖煥炳瑞景
綢繆重瞳舜目八彩堯雲克明克類乃武乃文是超東戶
宜繼南薰乃平萬方乃登四海墜典必舉舊章無改威儀

穆穆多士藹藹聲冠令王化冥真宰東漸漲溟西被流沙
徒施尉候匪間幽遐書文車軌籠爲一家貫胸雕髻慕我
諸華旣洽無爲益彰在宥疏網雖設吞舟是漏微火不防
燎原孰救四極鼇傾兩曜麟鬪熾熾湯旱湯湯堯水火爍
金流陵移山徙咨嗟祈祝隘溢圖史莫咎人謀難窮天理
漢后三七冥運則然秦都百二巨防虛傳風排月陣彗掩
星躔亶去岐山滿游崑嶽于橐于囊爲媛爲鶴書藏稽穴
琴捐洞壑沈吟往事追想前作爰乘天駟爰幸井絡澄澈
錦江崢嶸劍閣皇天震怒列藩會盟妖氣一蕩駭浪徐清

遂復中夏言歸上京兒童躍舞父老懽迎寢殿未安僞孽
爲害糾率姦人隱藏無賴洋洋漢源熠熠芝蓋爰警爰蹕
乃朝乃會僭逆旣顛鑾輅言旋魯戈迴日媧石補天方覩
萬物方永億年遠云厭代俄乃上僊嗚呼哀哉帝鄉兮莫
追天路兮何之龍馭飄兮弓劍在雀臺暮兮歌管悲嗚呼
哀哉顧惟幼冲祇紹明聖捧秦氏之誓詞度霸陵之遺令
載深號咽敢云稱咏望松闕兮杳冥撫棣萼兮精誠念烏
兔之奔邁仰牛斗之縱橫播芳塵於簡冊託悽恨於銘旌
嗚呼哀哉

欽定全唐文卷八百十五目錄

顧雲

代高駢上僖宗奏

代青州掌記謝本府辟啟

投顧端公啟

代人上路相公啟

投戶部裴德符郎中啟

投殿院韋侍御啟

投戶部鄭員外啟

投翰林劉學士啟

又謝下第後使人存問啟

投西邊節度使啟

投刑部趙郎中啟

投陸侍御啟

上池州衛郎中啟

上池州庾員外啟

上翰林劉侍郎啟

上鹽鐵路綱判官啟

上右司袁郎中啟

謝徐學士啟

代新及第人謝鹽鐵使啟

唐風集序

題致仕武賓客嵩山舊隱詩序

在會稽與京邑游好詩序

武烈公廟碑記

欽定全唐文卷八百十五

顧雲

雲字垂象池州人咸通十五年進士授校書郎高駢鎮淮南辟爲從事畢師鐸之亂退居霄川大順中分修德宣懿三朝實錄書成加虞部員外郎乾寧初卒

代高駢上僖宗奏

臣伏奉詔命令臣自省更勿依違者臣仰天訴地血淚交流如劍戟攢心若湯火在己只如黃巢大寇圍逼天長小城四旬有餘竟至敗走臣散微諸道兵甲盡出家財賞給

而諸道多不發兵財物卽爲已有縱然遣使徵得勅旨不許過淮其時黃巢殘兇纔及二萬經過數千里軍鎮盡若無人只如潼關已東只有一徑其爲險固甚于井陘豈有狂寇奔衝畧無阻礙卽百二之地固是虛言神策六軍此時安在陛下倉皇西出內官奔命東來黎庶盡被殺傷衣冠悉遭屠戮今則園陵開毀宗廟荆榛遠近痛傷遐邇嗟怨雖然奸臣未悟陛下猶迷不思宗廟之焚燒不痛園陵之開毀臣之痛也實在於斯此事見之多年不獨知于今日况自崔蒲盜起朝廷徵用至多上至帥臣下及裨將以

臣所料悉可坐擒用此爲謀安能辦事陛下今用王鐸盡
主兵權誠知狂寇必殲梟巢卽覆臣讀禮至宣尼射于矍
相之圃蓋觀者如堵墻使子路出延射曰潰軍之將亡國
之大夫與爲人後者不入于射也嚴誠如斯圖功也豈宜
容易陛下安忍委敗軍之將陷一儒臣崔安潛到處貪殘
只如西川可爲驗矣委之副貳詎可平戎况天下兵驕在
處僭越豈二儒士能戢強兵萬一乖張將何救助願陛下
下念黎庶上爲宗祧無使百代有抱恨之臣千古畱刮席
之恥臣但慮寇生東土劉氏復興卽輒道之災豈獨往日

乞陛下稍畱神慮以安宗社今賢才在野憊人滿朝致陛下爲亡國之君此等計將安出伏乞戮賣官鬻爵之輩黜鯁直公正之臣委之重難置之左右剋復官闕莫尚于斯若此時謗誹忠臣沈埋烈士匡復宗社未見有期臣受國恩深不覺語切無任憂懼之至

代青州掌記謝本府辟啟

某啟今月日衙前虞候某乙賁到簡牒伏蒙召署節度掌書記者伏以記室司存雄藩重務吳中草檄始召陳琳鄴下裁牋方徵阮瑀咸持彩筆以掌軍書况地控全齊封連

巨浸有外夷之琛賚多上貢之賦興假道旣繁飛章亦衆
永言斯任宜委高才且某徒效聚螢未嘗吐鳳讀傳而雖
云成癖爲文而未見愈風忽辱簡書遽蒙辟召捧函增懼
撫已知歸遐想膺門已積糜軀之志仰瞻龍節空懷拜賜
之誠

投顧端公啟

某啟某聞三吳詞苑不乏家聲兩晉儒林非無祖德洎風
流寢薄簪紱漸稀將闡吾宗獨付全德不依華宇更托何
門某遠派涓流寒林一葉學由耕石才實鏤冰爰自隨計

金定全月
卷之十二
三
遐方觀光上國難沽聲價易掇羈愁出谷風高先摧弱羽
登門浪急預返窮鱗伏念一擲魚竿四環星瑄華髮灑倚
門之淚遠書開隔歲之緘而又曾棄關繻空歸未得已隨
律柱捨此何之今則漸逼春期將臨試藝彎弧乏勇睇鵠
增憂伏以端公三翁德服儒流言爲詁訓萸枯有術肉骨
多方儻蒙少借餘波微迴誕說當見長房之竹亦可爲龍
則知莊叟之魚終能化羽輕瀆尊聽伏積憂惶延望清塵
不勝翹企

代人上路相公啟

某啟某本異仙才又非良器叨因射策偶忝決科始脫麻
衣纔沾斗粟方期清慎稍竊寵榮無何不善攝生遽沈痼
疾懸蛇結鬻鬻成災針石屢加鴛羸無減並相如患渴
雖覺有瘳比元晏病風猶稀可療實以彌年伏枕終日閉
關嬰幼素多饘餬莫給腸然烈火鬢染繁霜分無榮達之
由敢望陶鎔之力家室以幸聯姻戚合候起居伏蒙特軫
襟靈深垂顧問咨嗟生業憫惻羈危許以轉銜致諸外府
側聆嘉命寂聽好音扶策病躬開張淚目仰希尊旨如釋
沈疴拜賜猶賒銜恩欲泣望朱門而尚遠銘丹慊以先深

必也果踐玉書不移金諾資糧有羨藥餌無虞然後訪三世之名醫求千金之顯效獲離枕席再服冠纓維此昇沈實繫恩德因而待問希同喘路之牛誓此酬恩願比棲囊之雀謹專奉啟起居陳謝

投戶部裴德符郎中啟

某啟某聞放龜者無心覓印養雀者微意求環蓋由仁發於誠惠加於物因懷感激遂效禎祥若某者泳沼未期傷弦有日仰恩波而尚遠指雲路而猶賒欲望生成猶希憫惻實以才非辯鵲道異猶龍四海投知希逢厚遇二年求

試未過先場撫螢窗而便欲灰心對鴛花而徒傷淚目加
以秦吳路阻烟水程遙甘滑多違問安實闕中宵夢到星
漢俄沈萬里書迴槐檀遽改而又偶師題柱竊學棄繻明
未達而不還亦捨此而何適伏以曾將薄技叨忝殊私倘
蒙尚憫枯鱗猶傷塌翼纔霑末薦便是深恩縱不能生報
田文亦當死酬宣子傾心企望慙懇依投圓蓋低臨方輿
上載苟違斯語請告神明謹啟

投殷院韋侍御啟

某啟某聞干時妄動君子不爲小智大謀兵家所忌進憂

狂狷退恥敗亡詳觀躁靜之機爰契軍戎之事聊因牋簡
假喻師徒冀憑殷氏之函用代秦庭之泣某名同膠柱用
等鉛刀不思量力而行竊欲爭鋒而進洎焚舟學海決戰
名場衷甲不堅心城匪固兩經先榜但潰楚師再犯終場
亦班齊騎雄鋒缺落銳志銷磨執金鼓以無因送降旗而
不暇李陵矢盡項籍兵窮歸漢懷慚還吳失計所以重噓
懦氣再奮空拳欲罷不能旣蘇復上將欲戒嚴文陣蹂躪
議圍贖孟明奔命之辜雪曹沫敗軍之辱而我師甚寡彼
敵尚強未暇爭衡空憂失律持疑不進掉鞅難前先懷納

款之誠欲有乞師之志伏以侍御身弓落雁心劍剗犀儒
園中軍翰林盟主揮五色筆爲諸侯師出奇於文苑之中
二南銜璧決勝于粉闥之內七子興棺儻蒙益以奇兵濟
之餘勇旁麾義櫓遠借雲梯使武庫戈矛皆爲我旅文山
草木盡作王師苟無必勝之功甘受後期之責塵浼清聽
伏積憂惶謹啟

投戶部鄭員外啟

某啟某聞柳文暢之遇王融初因雅韻劉嗣芳之逢沈約
實自片辭或兩句可嘉或一篇堪獎則題於團扇寫在郊

居遂使西邸流芳南朝溢美時名愈大紙價愈高今也故
事具存清風盡在每因投卷竊賀伊人雖有負於斯文幸
遭逢其至鑒若某者學殊半豹藝愧全牛慙無經濟之文
空有悲哀之賦投竿魚浦遶跡龍津無一時暫廢討論無
一日敢忘索課誠不足揄揚大政感動知音比於雕蟲爲
文鳥跡成字雖無關至理亦粗有可觀輒敢編錄荒蕪輕
塵裁鑒禽中一鷄冀文舉之明知獄底雙龍庶茂先之必
識儻或冰壺借潤水鏡分光如其積玉之名示以鑑金之
譽一日三復非敢望於休文拂席易衣竊有期於謝混仲

尼墻峻元禮門深非因咫尺之書難寫依投之懇絃哀柱
促言切詞繁先甘妄進之嗤後受自媒之責干犯明德伏
積兢慚謹啟

投翰林劉學士啟

某啟某聞鄭元之謁馬融不知不去趙壹之干羊陟未遇
未休或三年常在於門庭或一日再經其墻仞蓋以此時
儒學無出於馬公當世文儒莫先於羊子今所以重桴靈
鼓復扣洪鐘者實存於此也某問不知三書惟闕五未能
窺豹強欲知龍洎投棄綸竿依憑湘帙從田巴於稷下謁

楊震於關西三篋之書粗知篇目一枚墜簡微識指歸栖
遲雖甚於蘇秦辛苦近同於甯越時或嚴霜屆節脫葉辭
枝曲突無烟幽窗有雪飛文月殿欲擬謝莊染翰蘭臺思
齊宋玉實以鈍踰龐統魯極曾參三犯龍門屢奔鯨浪元
珠難得空迷罔象之津大道多歧頻灑亡羊之泣輒塵藻
鑒叨獻菲辭竊自朋游或聞推許潘生摘錦巧借丹青謝
氏碎金猥加流品亦復願披仙霧頻扣朱門冀遂望塵不
期倒屣今則藩牴類窘幕燕同危正當羸角之時未識安
巢之計輒披肝胆來訴融明伏以學士辨敵飛龜才雄白

鳳鑒同止水公甚平衡潤青藻於詞林薙榛蕪於義路講理則絲繩讓直發言則山嶽慚輕儻假以風雲賜之慰薦奏揚雄於漢殿始郭隗於燕臺願借吹噓豈無裨助至於斬衣畢命顧印酬恩夜盜狐裘曉開魚鑰凡於死所請以身先干犯清嚴無任隕越謹啟

又謝下第後使人存問啟

某啟某聞收燼枝於烈焰必假良知出埋刃於重泉當資至鑒苟非精識孰測神功蓋由六律五音固應難審靈鋒寶鐔或未易知某不善守株妄修通刺爰從前歲秋杪去

年冬初累貢非詞上干藻鑑實以仙凡阻越流品懸殊天
上程遙人間信斷在塵寰而祝望空有精誠向雲路以存
思寧通夢想近者以龍門阻浪鷲谷摧枝鱗鬣傷殘羽翰
零落懷鄉莊舄正苦越吟去國鍾儀方悲楚奏誰言否極
忽有泰來前日某官委訪窮居曲傳芳訊側聆尊旨跪聽
玉音竊聞俯降咨嗟深垂憫惻初疑夢覺終謂風傳方當
退鷁之時忽得攀龍之便伏以學士優游仙苑泛泳天潢
覆錦高眠八花磚而讓寵含香視草五色筆以慚神况鏤
鼎思調前籌待運起骸有術肉骨多方儻蒙列在眾賓致

之下舍曉彈長缺不空效其旅魚夜取珍裘竊欲偕于狗
盜下情無任攀望依託感激之至謹啟

投西邊節度使啟

某啟某聞天列將星國分戎律必命英傑以專統臨故入
則掌驍衛而主親兵爲王心膂出則驅隼旟而駕熊軾分
國土田苟非敵號萬人謀通七德孰副擁旌之選仍當注
意之求伏以尚書勇冠山西聲聞隴右九天九地之法夜
受於神姝金箱金櫃之書曉傳於靈叟故得拔劍龍吼彎
弧雁驚使夷落無喧干戈盡偃邊烽息焰塞柝沈聲爲天

子之長城斷匈奴之右臂加以文通三變學洞九流郭璞
神毫每通於夢想羅含彩羽素貯於心誠時或月滿青樓
風清畫閣謝元暉之理郡不廢謳吟杜元凱之禦戎何妨
講讀而又政惟師古恩切字人利刃一揮亂繩皆理佇見
鳳銜仙詔豹製牙旗長驅十乘之驍雄福致一方之黎庶
遐瞻寵渥不越秋冬某稷下儒生天涯客子遠攜書劍來
拜旌旗識馬援之鬚眉見太初之禮樂頻叨前席屢聽元
談憂一夫不濟其生恥一物不得其所義形顏色照發襟
靈因敢覲縷血誠輕塵藻鑒必希恩察少賜知憐某射鵰

無功亡羊有恨婁敬之衣裘屢敝張儀之頰舌何爲至於
草織衡門雪封陋巷蛙鳴竈底魚躍釜中然猶講樹未休
書筠不已潛修此道以俟明時春初將謁朱門卜行上國
著言利見龜告叶從徑趨沙漠而來直指旌旗之下盡披
肝膈布在牋毫事逼丹誠言多直致志同鄰女止希蘇代
之餘光身類鮒魚惟冀莊周之一勺干犯清重無任兢惶
謹啟

投刑部趙郎中啟

某啟某聞弱水渺瀰匪風輪而不濟丹邱懸邈微羽駕而

何之苟非元化之功寧造長生之境其有本無靈氣復異
仙才徒勤九轉之功未識三清之路侍立於葛洪陂上願
附龍鱗徘徊於緱氏山前思隨鶴馭敢傾丹赤盡寄牋毫
扣德操之鼓鐘冀聞音響仰劉琨之山海庶覲高深或覲
憐憫少加披省某勾吳寒族鄒魯庸儒偶數殺青因思拾
紫捨獨繭文竿之樂預橫經染翰之游一別楚山四凋秦
葉進惟角觸退則羈棲望化羽之期烏頭詎白困龍門之
險魚尾將頽近者輒以荒蕪上千裁鑒實慚小道不副至
公或自朋游竊聆風旨潘江陸海曲借品流繡段金聲仍

如緣飾今則將臨筆陣漸逼掄材旣乏先容惟憂點額絃
哀柱促風勁葉危輒寫丹誠仰塵清鑒儻蒙特分餘潤微
假末光朽枿生蕙寒灰發焰纔沾慰薦便是光華酬恩豈
止於捐軀効德願同於異類迴眸顧印庶竊比於龜靈四
代五公請先兆於雀報

投陸侍御啟

某啟某聞河南器賈本爲能文渭北推袁曾因善賦或以
年將弱冠或以才越眾流繇是援自後生寘諸前席高擅
洛陽之價雄專倚馬之名故能爲文苑之美譚作儒家之

盛觀若某年將逾誼才不及宏論乏過秦詩殊詠史徒修
通刺莫偶深知加以故國三千青霄九萬但抱羈離之苦
畧無騫翥之期陶元亮之揮毫只思歸去庾子山之染翰
空有悲哀近者不自揣量輒懷狂狷累緘巴唱來叩郢門
螢近燭龍敢言芒耀鷄親威鳳方恥羽儀近自朋游竊聆
風旨每承譚論常借丹青免貽覆瓿之譏叨枉擲金之譽
此皆情深誘掖意在維持迺洛下之名華徑容攀附記吳
中之氏族常在接聯令申孔李之交許入原嘗之舍且知
逢晏子屈則宜伸媒遇蹇修醜而思嫁所以更傾幽抱來

訴融襟宋玉雄風必加吹煦謝莊明月終借光輝獲居七
士之間便是百生之忝干犯清聽伏積憂惶謹啟

上池州衛郎中啟

某啟某聞哲匠搜材不遺於櫟楠至公選士無間於蒿萊
苟求其文行高明豈計其人材仄陋故王褒之臨益部首
薦郡人杜密之理太山先推縣吏咸齒公侯之爵秩鬱爲
文學之宗師若某者早寓樂郊實爲編籍數間螢牖猶存
於去獸江邊一葉漁舟尚繫於還珠岸下頃者不量名分
學翫縑緇足履春闈肩隨貢士爭先路狹角力材微伏膺

於孔硯江毫終愧於秦雞遼豕加以中堂千里丹禁九重
空吟招隱之詩誰買長門之賦寒同冰子久迷溫燠之途
窮類偶人更軫漂流之嘆伏念自隨鄉薦便託門牆每以
蕪詞常干藻鑒必謂秉持刀尺流品生徒豈期來暮興歌
亂繩思理輒提郡竹俄擲省蘭寧知出刺之邦又是維桑
之地伏以郎中含香望重覆錦才高輟自南宮出臨偏郡
池魚官牘既濟於公私綸閣瑣闥已形於僉矚某近得弟
霄狀報竊知曲敦獎勸俯念孱微深嘉宵越之辛勤仍憫
廊生之落魄大垂恩煦下蔭宗親兒童知激勵之風骨肉

感饘餉之賜伏以秦吳阻隔江嶺縈迴不獲奔走階庭拜
陳感激隨車在御空懷軾下之熊無翼凌虛更羨旗邊之
隼

上池州庾員外啟

某聞陳太守之獎善先自郡人鄭司農之受知始從鄉佐
欲使恩隆薄俗化起儒門年代雖遷風流常在某者樵蘇
賤品桑梓遺民識昧機先智惟人下陳於器用則魏瓠興
譏列在官商則齊竽致誚徒以幼知經訓長辨義方偶近
縑緇遂捐耕釣披經閱史無怠於光陰雪牖螢窗每加於

懸刺至於論都敘別歎逝悲秋假烏有以交談擬子虛而
發論偶以書筠得句聊因起草成篇木海郭江亦常關慮
宋風謝月素所縈心縱不及於前修時見推於同輩爰自
束書辭楚懷刺游秦求試春官昇名貢士投暗而終多齟
齬秉機而本乏梯媒纔犯龍津旋悲鴈退且桃花浪峻難
前短鬣纖鱗蘋葉風高預返疎翎弱羽雖匡衡遊宦未及
十年而卞氏傷嗟俄經再用迴翔輦下求索關中橫戈而
未忍先降掉鞅而猶思更戰竊念秦舟已熱敵在不還蜀
柱曾題途窮未返而又戀深陟岵悲重倚門父子棲遲鄉

聞共笑蘇秦羈旅骨肉相疑儻蒙特降文符稍存庥庇纔
聞顧盼便是恩榮使魯鄰知敬孔某楚市不陵韓信謝郎
中端楚公皆曾投謁遂忝眷知近聞有使還家便令附狀
訴言名姓實辱獎憐非敢趑趄妄邀聲援

上翰林劉侍郎啟

某聞皎鏡當懸無疲屢照華鐘在簾不阻頻鏗其有飭貌
前來橫筵直進思投朗鑒願聽洪音孔室高深前遠仲由
之懇羊門峻阻難傳趙壹之懷所以再託牋毫用爲紹介
某吳門釣者闕里儒徒捨簷何獨蘭之綸學楊子雕蟲之

技慕顓孫之干祿效車子之聚螢西過許昌空吟景福東
游鄒魯欲擬靈光時或風入楚臺雪飛梁苑偶然成詠忽
爾盈篇是用歷韓鄭之門庭學楊衡之刺謁刻舟琢木未
擬迂疏鑿枘攻堅難方齟齬以致兩臨文陣俱挫筆鋒東
郭先生將逃濫吹步兵校尉欲泣窮途然亦默聽時謠頗
聞通論以爲蔡中郎之未顧則竹葉柯亭張司空之見知
則劍辭園室以時方濟會物有窮通須因甄藻之時冀別
沈淪之所求諸作者不在他人是以某月日輒貢菲詞上
干英眎以侍郎學士作時儀鳳爲國元龜學海波瀾常融

沆瀣情田壘畝曾稔耕耘屬詞則麗藻恒春視草則文星
鎮動言能振蟄勢可燃灰儻蒙垂一顧之恩出陸沈之所
平生進退決在指縱干犯清嚴無任惶懼企望之至謹啟
上鹽鐵路網判官啟

某聞積塊爲龍猶能致雨攻堅作鳥亦善因風此皆出自
巧心營於敏手被之鱗甲假以毛羽纔離土木之形便達
陰陽之理當其入用猶或濟時况某跡忝人曹名殊物類
瞻雲望畢粗識晦明指日看箕常知動息實以曾親筐篋
強學進趨人非冠玉之儀賦乏披金之譽澗松遲茂隴葉

難芳重趨孟門再困先浪以至萍漂陸海蓬轉九衢犬子
生涯惟餘四壁揚雄家產不過十金猶能染翰自強草元
無怠克己惟修其直道潛心將候於已知必有英賢寧無
濟會自叨將陋唱再黷沖襟螢邇太陽敢言芒耀鮒游滄
海方愧眇微豈期俯惻湮沈深垂汲引吐丹青於金石誇
姓氏於同心榮耀旣多鐫銘倍切今則俯臨文陣方假詞
鋒失水多虞傷弦易怯輒披肝肺更訴融明儻蒙少借餘
光微均美蔭庶使因風託便不藉於冥鴻假霧成斑無慚
於隱豹塵蹟清鑒無任攀望延佇憂懼之至謹啟

上右司袁郎中啟

某聞仙翁逞術叱石爲羊方士呈能結巾成兔苟神靈之
必至亦變化而何難其有欲改前蹤須憑異行徵諸事跡
或可比倫如某者稷下庸儒吳中單緒爰從幼稚竊慕搏
鵬思積學以干時欲代耕而求祿俄拋釣舸遂履名場朝
無九品之親業有三餘之苦揚子雲之詞賦自愧雕蟲丁
敬禮之文章人嗤畫虎邊蓬易斷路權難芳頻傷肅殺之
威未識陽和之力窮棲家遠旅宿衣單望鵠長疏懸鶉屢
弊况復吳波瀉綠秦嶽堆青懷橘莫從採蘭多阻犬書一

去元律方還蝶夢初迴涼宵已艾恨淚泉湧愁腸火煎數
奇而只自傷身語苦而何人傾耳竊想曾披仙霧獲拜仁
風煦以溫和借其光彩或終以陸沈興念再惻傷懷願假
雲雷偶蘇幽蟄豈可使雞鳴函谷只美馮諼龍躍天衢獨
傳文舉儻德同而義合寧古有而今無遐想音徽無任懇
迫遙瞻紫氣希傳尹喜之書更詣朱門恐涉張湯之刺謹
啟

謝徐學士啟

某啟某聞隋珠暗投路人興忿荆玉三獻明主懷疑非至

珍之有類有瑕亦明鑒之難逢難遇况某樵歌俗韻牛鐸
凡聲雖委巷末途時聞中律而曲卑調下難感知音洎儒
術中微時文稍變原玉之風流漸遠淵雲之事業攸歸亦
嘗悵望危津潺湲阮路斂毫興感掩卷長嗟今也河薦綠
圖山張翠檢開張網罟漁獵英髦周渭商巖皆辭釣築抱
關負鼎盡挂簪裾必有賢人出扶聖教歷詢時論實屬高
才伏惟學士瑤圃呈祥尼邱降瑞名題仙署足躡瀛洲東
哲臺前間披碧簡秦王府裏時閱瑤籤徐觀動息之蹤已
積鈞鎔之望某所以攜持陋唱塵玷朱門駭愕未遑軒車

忽至俯畱榮誨下獎微才拜啟琅函跪吟華藻笙簧滿耳
雕煥盈眸某嘗徧閱縑緗旁徵故實亦聞先達時接後來
遠則沈隱侯之獎何伯言纔聞發論近則韓文公之知李
長吉始議及門未有曲示恩私顯畱翰墨才微往彥遇倍
昔時仰戴恩榮已增銘篆謹當卷之鼃軸飾以錦牋置在
書囊永爲家寶

代新及第人謝鹽鐵使啟

某學慚辯豹業愧藏螢且乏智囊况無經笥雖冰盤凍飭
素所牽懷而長笛短簫亦嘗關慮豈謂攻堅少益雕朽難

能劉子駿之醬甌屢蒙相誚陸士衡之酒甕每沐見朝內
揣龍鍾深甘棄置去年因收敗卒決戰文塲奮藻儒林爭
衡筆陣方憂殿騎忽擢丙科姓名遽接於英髦骨肉初違
於凍餒懷仁空極欲報無由徒銘効死之心未得殺身之
地近見某官說竊知侍郎以沈淪軫念汲引開懷欲廣薦
衡遂先始隗託使變商爲角化慘成舒備雅奏於文絃偃
和光於暖谷遐沾厚惠咸出深仁今也周渭告祥殷巖叶
夢前籌待運鏤鼎思調明主繫心蒼生企踵某幸將微眇
願託鈞衡願居擁篲之先獲厠掃門之末庶因灰粉少措

毫芒下情無任

唐風集序

大順初皇帝命小宗伯河東裴公掌邦貢次二年遠者來
隱者出異人俊士始大集都下於羣進士中得九華山杜
荀鶴拔居上第諸生謝恩日列坐既定公揖生謂曰聖上
嫌文教之未張思得如高宗朝拾遺陳公作詩出沒二雅
馳驟建安削苦澀僻碎畧淫靡淺切破艷治之堅陣擒雕
巧之酋帥皆摧撞折角崩潰解散掃蕩詞場廓清文祲然
後有戴容州劉隨州王江寧率其徒揚鞭按轡相與呵樂

來朝於正道矣以生詩有陳體可以潤國風廣王澤因擢
生以塞詔意生勉爲中興詩宗生謝而退次年寧親江表
以僕故山偕隱者出平生所著五七言三百篇見簡詠其
雅麗清苦激越之句能使貪吏廉邪臣正父慈子孝兄良
弟順人倫綱紀備矣其壯語大言則決起逸發可以左攬
工部袂右拍翰林肩吞賈喻八九於胷中曾不薑介或情
發乎中則極思冥搜游泳希夷彤兀枯木五聲勞於呼吸
萬象悉於挾剔信詩家之雄傑者也美哉裴公之知人爲
不誣矣於戲旌別淑慝史臣之職也僕幸得爲之敘錄視

其人齒尚壯才力未盡謳吟之興方酣視其繼作得如周
頌魯頌者廣之爲唐風集老而益精畱次序一作別爲景
福元年壬子夏述

題致仕武賓客嵩山舊隱詩序

賓客諱攸緒則天皇后從姪也天授中封安平郡王遷殿
中監出爲揚州大督府長史聖厯中棄官隱居嵩山避榮
寵也想其始來捫危選勝駕迴栽基鋤走伊波控隱士飲
牛之渚螺排緌嶠對仙人駕鶴之峯移紫府之全模寫清
都之勝概王桃植砌董杏栽壇帳合蘿高床平石古飛流

界練貫幽響於風湍曙景張屏掛清光於露壑時或春花
發盡秋雨晴初虛籟調風斜窗印月吞露華兮漱煙液而
樂天和吟酒賦兮唱琴歌焉知帝力及龍圖去呂龜鼎還
劉中宗皇帝方欲訪道崑巖鳴鸞茨岫遙飛鶴版親授蒲
軒扣蓬藿之荒扉遠徵枚乘掃臯夔之右席強走嚴陵莫
不黃屋翹襟高霞疊夢由是輕鷗出浦明月離雲纔拜宸
堦旋登甲觀以公嘗棲洞府不喜塵機雖當掛珮垂紳愈
若投羅觸罟及飛章上闕雪涕辭天帳祖席於青門轄仙
裝於紫陌乃知飛霜匝野冰厓畱不死之蠶烈日熒溟珠

岸有不枯之草故能振清風於戚里飛逸駕於雲遶宜乎
與祿產分鑣夷齊結轍比夫吞腥咽腐懷祿偷安者不亦
優乎今則八桂森指五芝零落立松崖而盡日不見王孫
掃石壁以題詩別招逋客豈無來哲能紹元蹤聊剖短章
用旌高烈時睿文英武明德至仁廣孝皇帝御宇十二歲
也龍集辛卯律中林鐘十二日丙寅題

在會稽與京邑游好詩序

造化之功東南之勝獨會稽知名前代詞人才子謝公之
倫多所吟賞湖山清秀超絕上國羣峯接連萬水都會昇

高而望盡目所窮蒼然黥然兀然澹然先春煦然似畫似
翠似水似冰似霜似鏡削玉似劍者霞布似窈窕者霜清
似英絕者如是者千狀萬態綿亘數百里間則夫盤龍於
泉巢鳳於山蘊玉於石藏珠於淵固必有矣真駭目喪精
之所也其土沃其人文雖逼閩蠻而不失禮節雖枕江海
而不甚瘴疫斯焉郡邑一何勝哉將天地之樂萃於此耶
至於物土所產風氣所被鳥獸草木之奇妖冶嬋娟之出
前聖靈蹤往哲盛事此傳記所詳不假重言也斯但粗述
其勝耳僕雖乏才自侍從至此晨夕習業之外游覽所得

吟咏烟月攄散情志自足一時之興也亦足快哉然時或倚檻南臨回首西望相交朋遠誰與同之每思往年於京洛間見時俗之士浮淺之流多誇邑外人家有水木田園莊舍甚爲奇勝可比江山嘗與俱往謂信然今在此乃知前者之悠悠妄誇耳不足聽且夫方壺員嶠桃源洞天自標真聖之居不與囂塵相接非但計幽隱已也至於人寰所有游觀必當顯敞知名若會稽山水深不可測高不可及如是乃能孕靈怪藏珍寶生雲霞而盡勝概耳豈於十畝之地朝夕之間鑿爲汙池植爲幽藪源流旣邇根柢可

知深不過藏青蛙密不過棲鳥鵲而能出奇爲勝哉今之君子多尚奇好事貴達顯揚幽僻反陋則言之而實不足徵也不然則是人能與造物爭功矣今序其事貽諸朋好知之者幸棄彼冗瑣而同此游也爲通理矣輒以數篇鄙拙寄贈誠玷視聽貴盡其樂以資笑言

武烈公廟碑記

圓蓋亭亭配乎上者星辰之與日月方輿蕩蕩列于下者山嶽之與江河合生民而是謂三才資品類而均爲萬象至聰曰聖不測者神旣分幽顯之殊途乃假神祇而共理

所以在陽則有賢有哲幹運時權處闇則爲鬼爲神主張
陰騭其來尚矣可得言乎隋故大將司徒陳公諱杲仁字
世威漢太邱長之十七代孫也潁水聚星引蔓於盤根巨
蒂長城吞日分榮于玉葉金枝風神高而鶴立松顛器局
偉而鱗藏海底鄰家就學邱兒且歎于重生橋柱畱名犬
子終期于復出賈誼則年逾卅歲翁歸則才本兼人丹闕
上書金門應詔雕弓開而鵠裂鴻筆奮而鸞驚玉片桂枝
對天顏而失喜繡衣驄馬下雲路以嘶春時屬陳劍飛空
隋旗誓野象泣于開皇歲末龍驕于大業年中水調聲愁

柳絮輕籠于夜月迷樓香滿桃花自落于春風
爲書過而急甚飛星驚枕穩而誰驚醉夢以
至天關震動帝輦颺揚胡頭盡縮于漳河鬼
目盡生于建業繇是長山盜聚大洞兵興樂
伯通則狼戾秣林婁世幹則鳴張婺水公以名
光八絕道著一貞眉形高隱于石稜髭尾曾焦
于電火元惡授首金鉞鈿之飛來虜騎解圍鐵
連錢之入去蛇窮奔穴象怒投林俄成縛虎之
功遂降祝鳩之命天門公沈法興初傾款附末
恣姦欺烏頭暗寘于酒杯俄歸厚夜青骨雅
當于廟食迺啟藜祠祀寢先朝神畱故土像
設宏開于武

進威靈密護于全吳至若湘鷺羣飛商羊屢舞雲頭暗澹
木耳生獐南山垂欲爛之憂東海滌倒流之勢蘭羞一奠
桂醕三傾滂沱之澍雨繩垂倏忽之沈陰電掃其霽霖之
神速也如此又若鵲巢沈響蟻穴停封離火燒雲薰風爨
野土禺之精神愁悴泥龍之鱗甲乾枯巫覡陳辭簫笳合
奏筵上未容于徹饌空中已見于飜盆其救旱之靈應也
又如此變乾坤之舒慘神效已多却封境之妖氛陰功更
大皇唐乾符之二載也突陣將王郢等六十九人以唐山
告捷浙水旋師未及賞功潛思怙亂劫庫兵而竊發掠民

產以紛披移蟻蛭于狼山倚鷁舟于鼇海鉏耰合勢舉烈
火以焚燒樓櫓乘風駕驚濤而出入聚黨僅盈于萬眾連
頭遽陷于三州聖主臨軒出神謀而制勝將軍推轂杖金
鉞以專征尚書河東裴公讀八千卷儒書學五十家兵法
名光簪紱風習英雄有金熨斗之殊恩負玉唾壺之妙唱
入則褭香牋而揮彩筆批天子詔書出則提龍劍而臂鵬
弧主諸侯法令行開玉帳坐鎮金陵瀝精誠而願與冥通
指廟貌而遙期幽贊神能長驅鬼陣高輔靈旗於蒼茫惚
恍之間降雲物風濤之助遂使吳戈霜閃待春長狄之喉

越箭星流乃裂蚩尤之骨洎渠魁告斃餘黨乞降聊憑元
化以成功遂抗飛章而達聽優詔尋加於爵賞鴻恩別矧
其祠庭地控金甌城連鐵甕山分京峴水接蓬瀛冠蓋雲
浮西枕向吳之路松蘿帳合南連招隱之亭邃宇摩空雕
牆繚野翠瓦疊而琉璃色透彩椽排而玳瑁斑烘窗深則
青鎖疏風樓迴則璇題拂漢時或居人輟掉行客停鞍倚
欄當薄雨晴初寓日向丹楓落後霜馳足練指茂苑于煙
中黛染雙螺認海門於天末堂嚴塑像廊立靈宮凜氣貌
以如生奮威靈而若殺雷公電母目閃爍以疑瞋鬼將神

兵口囁嚅而欲語一顧則精魂愕眙載瞻則毛髮寒生所以祭非嚴而自嚴神不在而如在俄屬災流濮上盜掠江東孤城懷欲陷之憂萬姓負倒垂之懼丞相司徒燕國公軍謀出眾儒術超羣有岸上虎之雄名有人中龍之美稱才堪料敵檄可痊風落塞外之雙鵬氣吞沙漠挫筵中之五鹿聲烜議圍以詩書禮樂之兼才領征伐牢籠之重寄移從荆渚代撫吳民前茅高舉于中途大敵窮奔于外境仰惟妙算未畢前功將全締構之能更益增修之美先是中開紺殿別坐金人化廟木於祇園變祠宮爲淨土僧普

愿教傳西國喬紹南宗心花墮葉於空門忍草抽芽於覺
路談空說偈則天龍遊阿耨之池燃指爲燈則花雨落菩
提之木願以斧斤罷弄丹蘄停揮拂琬玉以求刊出牋毫
而請染雲也運籌無補磨盾何能鐵錢將當以銅錢徒懷
素志下駟用齊於上駟未吐良謀屬詞殊異于當仁承命
敢陳于固遜三言獲譽何酬橡吏之恩八字畱題更望中
郎之筆銘曰

乾儀廣大坤德幽元三光四氣五嶽百川陰陽莫測禍福
難詮不有神道誰分化權倖彼陳公挺生隋國忠作臣範

孝爲民則力遏鯨波手扶鼇極生立洪勲歿畱遺德狂童
作梗上將陳師陰兵助順戰卒乘時元兇殞命殘孽輸旗
恩頒上爵詔立嚴祠紺獸擎雲飛輦礙日帳卷靈座門開
廟室凜凜英氣堂堂偉質鬚磔蝟毛頭蹲虎骨歌鐘雜沓
簠簋連延酒有餘酹香無斷煙惟神是享惟禱斯虔安民
護境以永終天